

ЕСДҮГЭЭР БҮЛЭГ

ХАРУУЛЫН ДОТООД ЖУРАМ

214. Харуулын бие бүрэлдэхүүн харуулын даргын зөвшөөрөлгүйгээр байрнаас гадагш явахыг хориглоно.

215. Харуулын байранд тогтоосон журмыг хатуу сахина. Дуулах, хөгжимдөх, чимээ шуугиан гаргахыг хориглоно. Хууль дүрэм судлах, радио нэвтрүүлгийг чихэвчээр сонсох, ном унших, юм бичих, хөлөгт тоглоом тоглох, гутал цэвэрлэхийг зөвшөөрнө.

216. Автоматын гохыг буулгаж, гал хамгаалагчийг хааж хүхээггүйгээр, карабиныг сумгүй, замгийг хааж, гохыг буулгаж тавиурт тавина. Харуулын байранд байгаа бууны тавиурыг цоожлохгүй.

Харуулын бие бүрэлдэхүүн автоматын цэнэглэсэн хүхээг, карабин, винтовын сумтай хавчаар, жадыг бүснээс, харуулын дарга гар буугаар зэвсэглэсэн бол бууг биенээс салгахгүй.

Харуулын бие бүрэлдэхүүн харуулын байранд малгай, гадуур хувцасгүй байж болно.

217. Харуулын дарга, түүний туслагчийн зөвшөөрлөөр бууг тавиураас авна. Тэдний удирдлагын дор бууг задлахгүйгээр цэвэрлэнэ.

218. Харуулын дарга, түүний туслагч нар харуул шалгахаар ирсэн албан тушаалтантай харьцаж асуултад хариулна.

219. Харуулын бие бүрэлдэхүүн захны товчийг тайлж, бүсийг суллан, хувцас, байлдааны хэрэгсэлтэйгээ хэвтэж /унтаж/ амрахыг зөвшөөрнө:

219.1. харуулын дарга, туслагч нь хоногт 4 цагаас илүүгүй;

219.2. манаа халагч, харгалзагч, тээврийн хэрэгслийн жолооч нар харуулын даргын зөвшөөрлөөр;

219.3. харуулчдын ээлж тус бүр суугаа ээлжийн үүрэг гүйцэтгэсний дараа цэгт гарах хүртэл;

219.4. байгууламж /цэг/-ийг зөвхөн шөнийн цагаар хамгаалдаг харуулчдын ээлж харуулын цэгээс бууж, харуулын байранд ирээд дахин цэгт гарах хүртэл тус тус амарна.

Амарч байгаа бүрэлдэхүүнийг гутал, хөлийн ороолтоо тайлж хатаахыг зөвшөөрнө.

220. Харуулыг “Зэвсэгт” дуудахад харуулын байранд байгаа бүх бүрэлдэхүүн зэвсгээ авч, цэгийн дугаарын дарааллаар жагсана.

Харуулын бүрэлдэхүүнийг харуулын байрнаас гаргах бүх тохиолдолд /гал түймэр, гэнэтийн аюулаас бусад/ харуулын даргын туслагч буюу манаа халагчийн нэгийг, тэдгээрийг байхгүй үед нэг харуулчинг харуулын байранд үлдээнэ.

221. Ангийн байрлалын гадна байрладаг харуулын хоол, ундыг уг харуулыг гаргасан салбарын захирагч буюу ангийн жижүүр хариуцан хүргүүлнэ.

Цэргийн анги дотор байрладаг харуулыг хооллуулах асуудлыг “Цэргийн алба зохион байгуулах тухай” ангийн захирагчийн тушаалд заасан журмаар харуулын дарга хариуцна.

222. Харуулын байр, харуул жагсаах талбай, бие засах газрыг цэвэр байлгах, түүнчлэн пийшин галлахыг харуулын бүрэлдэхүүн хариуцаж, харуулын

дарга, туслагч хяналт тавина.

223. Харуулын байранд өдөр тутмын цэвэрлэгээнээс гадна ангийн штабын даргаас тогтоосон өдрүүдэд ангийн хүн эмнэлгийн даргын заавраар, сард 2-оос цөөнгүй удаа ариутгал хийнэ.

224. Хүйтний улиралд хоногт 4-өөс доошгүй удаа харуулын байрыг агааржуулна. Дулааны улиралд байрны салхивчийг нээлттэй байлгаж болно. Өвлийн улиралд харуулын байрыг +18°C-ээс багагүй дулаантай байлгана. Ангийн захирагчийн тогтоосон цагийн хуваарийн дагуу пийшинг галлана. Харуулын бүрэлдэхүүний хоол халаах, хувцас хатаах байрны пийшинг шаардлагатай үед харуулын даргын зөвшөөрлөөр цагийн хуваариас гадуур галлаж болно. Хүйтний улиралд тогтмол халуун цайтай байлгана. Цэргийн хотхоны гадна байгаа харуулын байрны цонхыг хаалтаар хааж, дотроос нь түгжинэ.

225. Онц чухал байгууламж /цэг/-ийг хамгаалдаг харуулын байрыг хамгаалуулахаар тусгай харуулчдыг томилж болно. Цэргийн анги /хамгаалж буй байгууламж /цэг//-ийн байрлалд байрласан харуулын байрыг цагийн манаачаар хамгаалуулна.

Харуулын байрны үүдэнд цагийн манаач гаргахгүй бол орох хаалганд хянах цонх гаргаж, дотроос нь байнга түгжээтэй байлгана.